

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **DATO' SRI REEZAL MERICAN BIN NAINA MERICAN [KEPALA BATAS]**

TARIKH : **17 JULAI 2019**

SOALAN :

Dato' Sri Reezal Merican bin Naina Merican [Kepala Batas] minta **MENTERI LUAR NEGERI** menyatakan berkenaan isu Rohingya yang telah dibangkitkan sewaktu *OIC Ad Hoc Committee on Accountability for Human Rights Violations Against Rohingya* sewaktu *Islamic Summit ke-14*.

JAWAPAN

Tuan Yang di-Pertua,

Saya ingin mengucapkan terima kasih kepada Yang Berhormat Kepala Batas di atas pertanyaan yang dikemukakan.

2. Untuk makluman Dewan yang mulia ini, Malaysia amat prihatin terhadap krisis kemanusiaan yang melanda etnik minoriti Rohingya di Myanmar. Krisis ini merupakan antara kemelut yang amat berat yang melanda rantau Asia Tenggara sejak sekian lama. Perkara ini telah memberi kesan limpahan negatif ke atas negara-negara jiran Myanmar seperti Bangladesh dan Malaysia. Oleh yang sedemikian, krisis ini harus ditangani dengan segera demi memelihara kepentingan, keselamatan dan kestabilan di rantau ini.

3. Di peringkat OIC, Malaysia merupakan ahli kepada Jawatankuasa Sementara (Ad Hoc) OIC Mengenai Akauntabiliti Terhadap Pencabulan Hak Asasi Manusia Ke Atas Etnik Minoriti Rohingya di Myanmar.

Jawatankuasa Sementara ini ditubuhkan oleh OIC dengan tujuan untuk meneliti isu-isu pencabulan hak asasi kemanusiaan dan kekejaman yang telah dilakukan ke atas etnik minoriti Rohingya, seterusnya mengenakan tindakan sewajarnya ke atas pihak yang bertanggungjawab dengan menggunakan instrumen undang-undang antarabangsa.

4. Jawatankuasa Sementara ini telah mengadakan mesyuarat keduanya pada 29 Mei 2019 di sela-sela Sesi Ke-14 Sidang Kemuncak OIC di Arab Saudi bagi membincangkan pelan tindakan Jawatankuasa Sementara ini termasuk cadangan Republik Gambia untuk membawa isu Rohingya ke Mahkamah Keadilan Antarabangsa (*International Court of Justice – ICJ*). Sidang Kemuncak OIC telah menggesa Republik Gambia untuk mengambil tindakan segera dengan membawa isu Rohingya ke ICJ dan perkara ini telah digariskan dalam Kenyataan Akhir Sesi Ke-14 Sidang Kemuncak OIC.
5. Semasa mesyuarat ini berlangsung, Malaysia telah menekankan tiga (3) pendirian utama mengenai isu Rohingya, iaitu, membawa penjenayah-penjenayah ke muka pengadilan, memastikan penghantaran balik Rohingya ke Myanmar secara sukarela, selamat dan bermaruah serta meneruskan bantuan kemanusiaan kepada Rohingya. Malaysia turut mencadangkan supaya mekanisma ASEAN digunakan dalam menangani isu Rohingya termasuk perbincangan bersama Kerajaan Myanmar.
6. Malaysia sentiasa memainkan peranan yang aktif terutamanya dalam OIC bagi membela nasib Rohingya yang tertindas serta menyeru agar penjenayah-penjenayah pencabulan hak asasi kemanusiaan dan kekejaman yang telah dilakukan ke atas Rohingya dibawa ke muka pengadilan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WILLIE ANAK MONGIN
[PUNCAK BORNEO]**

TARIKH SOALAN : 17 JULAI 2019 (RABU)

SOALAN NO. 3

Minta **MENTERI PEMBANGUNAN USAHAWAN** menyatakan :

- a. Langkah Kementerian untuk memperkasakan Tabung Ekonomi Kumpulan Usaha Niaga (TEKUN Nasional) supaya boleh memanfaatkan lebih banyak usahawan khasnya daripada Sabah dan Sarawak. Setakat ini, berapa ramaikah usahawan dari Sabah dan Sarawak yang telah dibantu berbanding usahawan dari Semenanjung; dan

- b. Apakah strategi Kementerian untuk melahirkan lebih banyak usahawan muda dari Sabah dan Sarawak yang agak terpinggir daripada negeri-negeri lain.

JAWAPAN

Tuan Yang Dipertua,

1. Melalui Belanjawan 2019, peruntukan sebanyak RM100 juta kepada TEKUN Nasional telah disediakan oleh Kerajaan untuk merancakkan pembangunan usahawan mikro dan seterusnya menyumbang kepada pertumbuhan ekonomi negara termasuk Sabah dan Sarawak. Pelbagai usaha dan penambahbaikan telah dilaksanakan dalam memastikan pembiayaan kewangan yang diberikan kepada usahawan dilaksanakan secara berfokus serta optimum.

Sejak penubuhan TEKUN dari tahun 1998 sehingga bulan Mei 2019, RM504.7 juta pinjaman telah disalurkan kepada 45,992 usahawan dari negeri Sabah dan RM286.3 juta kepada 31,897 usahawan dari negeri Sarawak. Berbanding dengan Semenanjung Malaysia, TEKUN telah menyalurkan pembiayaan sejumlah RM4.68 bilion kepada seramai 351,805 orang usahawan.

Manakala bagi tahun 2019, TEKUN telah menyalurkan pembiayaan sebanyak RM16.9 juta kepada seramai 1,951 orang usahawan dari negeri Sabah dan RM18.9 juta kepada seramai 1,173 orang usahawan dari negeri Sarawak. Berbanding dengan semenanjung Malaysia, TEKUN telah menyalurkan pembiayaan sebanyak RM144.2 juta kepada seramai 11,916 orang usahawan. Sarawak merupakan negeri kedua tertinggi menerima pembiayaan bagi tahun 2019 diikuti oleh negeri Sabah di tempat ketiga tertinggi.

TEKUN mensasarkan bagi tahun 2019, seramai 2,613 orang usahawan di negeri Sabah dijangka akan menerima peruntukan sebanyak RM50.7 juta manakala bagi negeri Sarawak seramai 1,871 orang usahawan dengan peruntukan berjumlah RM25 juta.

2. Kementerian Pembangunan Usahawan (MED) amat prihatin terhadap kesejahteraan usahawan muda dalam mengharungi cabaran ekonomi masa kini. Beberapa inisiatif telah dilaksanakan oleh MED dalam membangunkan lebih banyak usahawan muda dari Sabah dan Sarawak seperti Program Usahawan Muda di bawah MaGIC. Di bawah inisiatif ini,

NO. SOALAN: 3

program yang telah dilaksanakan adalah Borneo744 di Bintawa, Kuching yang memberi tumpuan kepada bidang keusahawanan, kesenian dan kebudayaan. Di samping itu, program Pre Accelerator Tabung Ekonomi Gagasan Anak Sarawak (TEGAS) melalui kerjasama dengan Koperasi Belia Inovatif Sarawak (KOBIS) bertujuan menjana inovasi dan memberi pendedahan “startup” berinovatif. Inisiatif yang telah dijalankan ini telah melibatkan 4,496 usahawan muda dari Sarawak.

Bagi negeri Sabah pula, MaGIC telah bekerjasama dengan “Lean In Sabah” bagi melaksanakan program Borneo Re-Alliance Avenue for Entrepreneurs (BRAVE) bagi melahirkan lebih banyak usahawan muda di Sabah. Sehingga kini, 1,703 usahawan muda dari Sabah telah melibatkan diri dalam program ini.

Selain daripada itu, MED juga telah melaksanakan Program Tunas Usahawan Belia Bumiputera (TUBE) di bawah SME Corp Malaysia dan Program Pembangunan Usahawan Siswazah (PPUS) di bawah TEKUN untuk usahawan muda di Negeri Sabah dan Sarawak.

Program yang ingin saya tekankan adalah Program Agropreneur Muda (PAM) di bawah TEKUN. Program ini khusus untuk golongan belia yang berumur di antara 18 hingga 40 tahun. Pendekatan program ini adalah bagi membantu dan menggalakkan penglibatan golongan belia dalam bidang keusahawanan berdasarkan aktiviti pertanian seperti tanaman, ternakan, perikanan, industri asas tani termasuk pemasaran, khidmat sokongan dan agro pelancongan.

Bagi program ini, TEKUN telah mengeluarkan pembiayaan berjumlah RM17.0 juta kepada 459 orang usahawan. Daripada jumlah tersebut, seramai 25 usahawan dengan nilai pembiayaan RM338,000 adalah dari Sarawak dan 12 usahawan dengan nilai pembiayaan RM355,000 dari Sabah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI AZALINA OTHMAN SAID
[PENGGERANG]**

TARIKH : 17 JULAI 2019 (RABU)

SOALAN NO. 4

DATO' SRI AZALINA OTHMAN SAID [PENGGERANG] minta **MENTERI KESIHATAN** menyatakan statistik terkini kanak-kanak di Malaysia yang dijangkiti virus HIV/AIDS dan berapakah rumah perlindungan HIV/AIDS yang dikendalikan masing-masing oleh pihak Kerajaan dan pihak swasta dan apakah jenis bantuan yang disediakan oleh Kementerian untuk mereka.

JAWAPAN

Yang di-Pertua,

Bilangan kes HIV baru yang dilaporkan di Malaysia adalah sebanyak 3,293 kes, atau pada kadar 10.0 kes bagi setiap 100,000 penduduk pada tahun 2018. Daripada jumlah ini, seramai 47 (merupakan kanak-kanak berumur bawah 18 tahun).

Mengikut maklumat dari Majlis AIDS Malaysia (MAM), pihak MAM telah memberi bantuan kewangan untuk kos pengurusan kepada 13 rumah perlindungan yang turut menerima pesakit HIV. Antaranya, seperti Rumah Soleha (Kuala Lumpur) dan Casa Harapan (Pahang) turut mempunyai penghuni kanak – kanak pesakit HIV.

NO SOALAN : 4

Adalah dimaklumkan bahawa skop fungsi KKM ialah pencegahan penyakit, jagaan serta rawatan pesakit di hospital atau di jagaan asas tetapi tidak termasuk penyediaan rumah perlindungan sementara.

Sebelum ini, kos pengendalian rumah perlindungan adalah di bawah KPWKM tetapi pada tahun 2017, KPWKM telah memberhentikan bantuan kos pengendalian dan meminta KKM mengambil alih kos pengendalian. Walaupun KKM tidak mempunyai peruntukan khas untuk tujuan ini, namun atas dasar perikemanusiaan, sebahagian kos pengendalian rumah perlindungan tersebut telah dibiayai menggunakan dana bantuan kerajaan di bawah KKM untuk NGO. Ini telah memberi kesan kepada program pencegahan kerana peruntukan NGO amat terhad dan ianya seharusnya dikhususkan untuk pencegahan dan kawalan HIV.

Sekian, terima kasih.

**MESYUARAT KEDUA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN MUSLIMIN BIN YAHAYA [SUNGAI BESAR]

TARIKH : 17.7.2019 (SELASA)

SOALAN NO. 5

minta **MENTERI PEMBANGUNAN LUAR BANDAR** menyatakan apakah insentif dan bantuan untuk membantu usahawan-usahawan luar bandar.

JAWAPAN

Tuan Yang di-Pertua,

1. Melalui Pelan Harapan Pembangunan Luar Bandar (PLHPLB) 2018 – 2023, Kementerian ini telah memberikan penekanan khusus kepada para usahawan di luar bandar di mana salah satu teras utama PLHPLB merupakan Teras Keusahawanan. Manakala satu lagi teras, iaitu Teras Ekonomi juga sangat berkait rapat dengan program keusahawanan.

2. Di bawah Teras Keusahawanan, terdapat sebanyak lima (5) strategi yang merangkumi sebanyak lima belas (15) program/projek yang akan memberikan manfaat kepada para usahawan. Antara lain adalah seperti program *Rural Business Challenge*, perluasan *DesaMall@Online*, Skim Pembiayaan Usahawan Tekno, program Promosi Usahawan dan penyertaan dalam ekspo serta pameran perniagaan.

3. Manakala Teras Ekonomi pula mengandungi enam (6) strategi di mana strategi ke-6 iaitu Membangunkan Persekutaran Perniagaan yang Kondusif banyak merangkumi program atau projek berkaitan Keusahawanan seperti *Rural Business Outlet*, *Rural to Global* dan Pemerkasaan Premis Usahawan Luar Bandar.
4. Secara keseluruhannya, berdasarkan program dan projek yang terkandung dalam PHPLB tadi, usahawan luar bandar yang layak dan memenuhi syarat adalah berpeluang untuk menerima insentif atau bantuan daripada KPLB melalui semua jabatan/agensinya dalam semua aspek sokongan perniagaan iaitu Modal Kewangan, Latihan, Sokongan Teknikal & Teknologi, Khidmat Nasihat & Pengembangan Kapasiti, Lokasi & Kemudahan Premis, Pemasaran, Kajian & Pembangunan (R&D) serta Sokongan Maklumat.